

MME NTIÑ-NNIM IKỌ KE ABAÑA MESSIAH

Psalm 2:1-12; 22:1, 18; 45:1-17; 68:16-19; 69:20, 21;

110:1-7; 118:21-24; 132:11

QYQHỌ UKPEP-ÑKPỌ 470

Eke Mkp̄arawa

IKỌ IBUOT: “Ema esio Eyen Abasi enim ke n̄tak emi, man Enye akp̄abiat utom Satan”
(1 John 3:8).

Ima Abasi

Ke John 3:16 etiñ enọ n̄nyin ete: “Abasi akamama ererimbot n̄tem, tutu Enye osio ikp̄oñ-ikp̄oñ Eyen emi Enye obonde ọnọ, man owo ekededi eke ọb̄uqt̄de idem ye Enye okutak, edi enyene nsinsi uwem.”

N̄nyin ikemeke nditim m̄fiok ofuri ima Abasi. N̄dikere nte ke Enye eyedōñ Jesus, ñkukure Eyen Esie, edi ke idiok ererimbot emi nte nsek Eyen ke Bethlehem! Enye akamana oto Edisana añwan Mary, enyuñ ebok Enye ke usuhode ebiet, ke akade iso Enye ayak uwem Esie ke mkpa kr̄os koro Abasi, Ete Esie, akamade n̄nyin ke edisana ima.

Eñw̄oñọ Abasi

Edi Abasi ekebem iso etiñ ọnọ owo abaña Andinyaña ke Iñwan Eden. Okposuk edi nte Adam ye Eve ekenamde idiok-ñkp̄o, Abasi ikeyakke mmọ eka ke nsinsi itie etre ndisiak usuñ ub̄ohọ man ew̄orọ ke idiok-ñkp̄o mmọ. Christ ekedi “Eyen-er̄oñ, emi ekewotde toto ke erit̄oñọ ererimbot” (Eriyarare 13:8).

Ke mme emana ke Akani Ediom̄i, Abasi ama esifiak ọs̄oñọ ke ediwak ini eñw̄oñọ edidi Andinyaña. Ibet emi ekenode ke ubok Moses, ye mme ewuhọ esie, ekanyan ubok ewut Andinyaña owo emi ke usen kiet ediduokde Iyip Esie man efen idiok-ñkp̄o ofuri ererimbot.

Ime Abasi Ye Mmeme Owo

Abasi ama ọfiok ete ke owo isopke ndikpep ñkp̄o, edi emehe ke ndibiat mme item Esie. Ke anyan ime ye ima Esie, Enye ada ediwak isua ye nsio-nsio usuñ ndinam ikot Esie edu ke m̄beñeidem ebaña eridi Eyen Esie ke ererimbot emi.

Ema eda mme anditiñ n̄tiñ-n̄nim ikọ etiñ enọ mmọ ete ke Eyen Abasi edimana oto ke edisana eyen añwan. Ema enyuñ etiñ enọ mmọ ñko ebaña kpa ebiet emi Enye edimanade. Ema eyarare enọ mmọ ete ke Spirit Abasi eyedoro Enye ke idem. Eyekot Enye Utibe, Ọnọ-item, Nsinsi Ete, Ọb̄oñ Emem.

Mme anditiñ n̄tiñ-n̄nim ikọ ema enyuñ etiñ ñko ebaña mme ukut Esie, mkpa Esie, edibuk ye eriset. Ema etiñ ebaña Iyip ufak Esie ye nte inia Esie edikokde n̄nyin. Akananam owo baba kiet imanake emi eketiñde ñkp̄o n̄tem ebaña.

Emana Andinyaña

Ke okoneyo kiet, ke ñkp̄o nte t̄osin isua iba emi ekebede, angel kiet ama ọbīoñore mme ekpemer̄oñ ke iso ke mben obot Bethlehem man etiñ mbuk emana Jesus ọnọ mmọ. “Ndien idaha oro udim mbon heaven edu ye angel oro; mmọ enyuñ etoro Abasi, ete, Uboñ enyene Abasi ke ata enyoñ. Emem onyuñ odu ke isoñ, ke otu owo emi Enye enende iso ye mmọ” (Luke 2:13, 14).

Mme ekpeme-er̄oñ ema es̄os̄op eka ke usin udia ufene ndikut nsek Eyen Christ. Mmọ ema efiak enyoñọ ye akwa idaresit etiene mme otu-er̄oñ mmọ, enyuñ etiñ enọ mmọ efen ebaña utibe ñkp̄o-ntibe oro akadade itie.

Ke Jesus ama okosim usen aba, ema emen Enye eka ke Itie-ukpono Abasi nte Ibet eketemedede (Leviticus 12:3, 4). Do ke Itie-ukpono Abasi nditọ Abasi iba emi ekenamde akpanikọ enọ Abasi ema ekut Jesus, mmọ ekedi Simeon ye Anna. Spirit Abasi ama ayarare owut mmọ ete ke emi ekedi Andinyaña. Udōñ emi mmọ ekenyenede ke anyan ini ndikut Messiah ama ọw̄orọ osu. Mmọ ñko, ema enyuñ etiñ ñkp̄o ebaña ini iso Esie (Luke 2:25-28).

Idara Emi Akabuhade ye Mfuhọ

Se ikadianade nti eñwōñō ke abaña edidi Andinyaña okonyuñ edi mme ntiñ-nnim ikọ ke abaña edisin Enye, ukut ye mkpa Esie. “Ndidem ererimbot edaha eda, mbōñ enyuñ ebono eduk odu ebaña Jehovah ye Messiah esie, ete, “Eyak nnyin ibuñ ñkpọkọbi mmọ, inyuñ ikibi uruk mmọ ke idem nnyin iduok” (Psalm 2:2, 3). “Esuene ọmọbuñ mi esit; udoñō anam mi: mmonyuñ ntie mbet owo eke atuade mi mbom, edi iduhe; nnyuñ mbet mme ọdọñ esit, edi ñkwe. Ndien mmọ enọ etidot ke udia mi; enyuñ enọ mi vinegar ññwōñ ke nsatitọñ mi” (Psalm 69:20, 21).

Akpana nte nnyin inọ Andinyaña ekom eti-eti emi okonyimede ndidi, okposuk edi Enye ọkọdionode ete ke isañ Esie mi ke isọñ eyeda Enye ọkọsuñō ke mkpa ke obot Calvary.

Erikan Oto Ke Mkpa

Herod ama oyom ndiwot Jesus ke nsek; mbio eken edomo ndisio enye nduok ke ebedeñ man Enye akpa koro mme ukpep-ñkpọ Esie okobiomde mmọ ikpe. “Enye ekedi ke ebiet Esiemọ, edi mmọ emi edide iman Esiemọ idarake Enye” (John 1:11). Mme andikara mme Jew ke akpatre ema emum Enye ewot. Mmọ ekefiori ete, “Ewot Enye ke cross! Ewot Enye ke cross! enyuñ etiñ ete “Iyip Esie akpakam ọkọbọ nnyin ye nditọ nnyin” (Matthew 27:25). Ekedi ke Krọs ke Jesus okofiori ete, Abasi mi! Abasi mi! nsinam afo ọkpọñde mi?” (Psalm 22:1).

Mkpa Jesus ikowutke nte ke ema ekan Enye, nte emi ererimbot ekpemade ndinim ke akpanikọ nnyuñ ñkppep. Ke mkpa Esie, Enye ekedi Eyen-erōñ emi ananade ndo! Enye ama anam Ibet ọyọhọ ke abaña kpukpru mme erōñ emi ekewiwade ke idak Akani Ediommi emi ekedide mbiet ñkpọ, man ọnọ ufak ke abaña idiok-ñkpọ. Ekeduok Iyip Esie man efak nnyin esio ke mme idiok-ñkpọ nnyin.

Edi mkpa ikomumke Andinyaña nnyin ikama ke anyan ini. Ke ọyọhọ usen ita Enye ama eset ubōñ-ubōñ akan mkpa, hell ye udi. Ini kiet efen angel ama afiak etiñ ete: “Nsinam mbufo eyomde Enye emi odude uwem ke otu mme akpa-mkpa? Enye iduhe mi; Enye emeset” (Luke 24:5, 6).

Usuhore emana, mkpa but, ubōñ-ubōñ eriset! Enye akanam kpukpru ñkpọ ke nsuk-ibuot ọnọ uduak Ete. Abasi eketiñ abaña Enye ete: “Emi edi edima Eyen Mi, emi esit enemde Mi eti-eti ye Enye” (Matthew 3:17).

Ke Ọtọñō Ntak Edi

Ye mme ntiñ-nnim ikọ ke abaña emana Jesus, uwem, mkpa ye eriset, emi ke ediwak idaha edionode nte akpa eridi Esie, imokut mme utibe eñwōñō editọñō ntak ndi Esie ke ererimbot emi. Mme eñwōñō edu emi etiñde ebaña ini emi edinimde kpukpru mme asua ke idak ukot Esie.

Mme eñwōñō ke abaña editọñō ntak ndi Christ ye usen emi edinamde kpukpru ñkpọ edu ke idak Esie, ikamake inemesit inọ anam-idiok ye mmọ emi miteñeke Abasi.

Satan ye mmọ emi ekenamde ñkpọ esie idinyeneke aba ifet. “Enye etie ke enyōñ asak: Ọbōñ ababiaña mmọ. Ndien enye ọdọhọ ye mmọ ke iyaresit esie, onyuñ ada ikañ ifuresit esie esin mmọ ndik. Ndien edi ami mmonim edidem mi ke enyōñ Zion. . . . Beñe mi, ndien nyenọ fi mme idut ke udeme fo, nyenọ mme utit ererimbot, nte afo ada enyene. Afo eyenuak mmọ ke esañ ukwak; onyuñ obom mmọ nte ñkpọ eke obot-eso anamde” (Psalm 2:4-9).

Nte mme ntiñ-nnim ikọ ke abaña akpa eridi Christ ke isọñ ekeworode esu utibe-utibe, ntre ke mme mmọ emi ebañade editọñō ntak ndi Esie man onim nsinsi obio Ubōñ Esie ediworọ osu. “O Abasi, ebekpo fo odu ke nsinsi mmonyọ edinen ido edi mmonyọ ubōñ fo. Afo ama se inende, onyuñ asua se ikwañade; oro esin Abasi, kpa Abasi fo, ada aran idara eyet fi, akan mme ufan fo” (Psalm 45:6, 7). “Obio ubōñ ererimbot emi amakabare edi Obio Ubōñ Ọbōñ nnyin ye Christ Esie. Enye eyenyuñ ada ubōñ ke nsinsi nsinsi” (Eriyarare 11:15).

Enọ Abasi

Abasi ama ọnọ nnyin ñkukure edibon Eyen Esie oto ke akwa edisana ima Esie. Eyen Abasi, Enọ Abasi, edi owo itimke idara Enye. Enyene ndibọ enọ ye esit ekom man oro akpada idara ọsok andibọ ye andinọ enọ nde.

Ekeme ndidu fi ke mkpaidem abaña akamba uwa emi Abasi akawade ke ndinọ Eyen Esie edi. Ke nso utọ ido ke afo adara enọ Abasi? Nte afo ọmọfiok ete ke Jesus ekedi enọ emi ekenode fi saña-saña, mme edi nte ke afo udoñke enyin ke enọ emi, nte afo ufiokke ufon esie? Mme ñkpọ ererimbot emi idighe se edade

edomo ye “pearl kiet emi okponde ekom-urua.” “Nkpọ-eyen-utom idiok-nkpọ edi mkpa, edi enọ Abasi edi nsinsi uwem ke Christ Jesus Qbọn nnyin” (Nwede Mbon Rome 6:23).

MME MBUME

- 1 Ini ewe ke ekenọ akpa enwọnọ ke abañā Andinyañā?
- 2 Ini ewe ke Abasi okonim uduak Esie ke abañā edinyañā?
- 3 Didie ke ibet akanyan ubọk owut Jesus?
- 4 Tiñ mme ntiñ-nnim ikọ iba ke Akani Ediomini emi abañade emana Christ.
- 5 Nso ikọ ke nnyin ikut ke Psalm emi Jesus eketiñde ke Krọs?
- 6 Nso ntiñ-nnim ikọ ke eketiñ ebañā ofọñ-idem Christ?
- 7 Nso idi ntak emi mkpa Christ mikedighe nte ke ema ekan Enye?
- 8 Nso idi ntak emi ekedade Jesus nte eyen-erọn?
- 9 Mme anie ekedi akpa mmọ emi ekebode etop emana Jesus?